



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU



## ***Komunikadu Imprensa***

***15 Janeiro 2015***

### **Kazu Violénsia Doméstika Aas iha Suku Holsa: Komuidade sira husu atu governu halo sosializasaun ba Lei Kontra Violénsia Doméstika**

Iha 13 Janeiro 2015, Judicial System Monitoring Programme (JSMP) liuhusi Unidade Relasaun Públiku no Unidade Justisa ba Feto no Labarik, fasilita treinamentu kona-ba "Asesu ba Sistema Justisa Formal" ba komuidade sira iha Suku Holsa, Sub-distritu Maliana, Distritu Bobonaro.

Partisipante ne'ebé partisipa iha treinamentu ne'e hamutuk ema nain 30, kompostu husi feto 15 no mane 15.

Objetivu husi treinamentu ne'e hanesan komitmentu JSMP nian hodi kontinua habelar informasaun relasiona ho oinsa atu prosesa kazu tuir sistema formal ba komuidade sira liu-liu sira ne'ebé susar atu hetan informasaun.

“Treinamentu ida ne'e hanesan atividade kontinuausaun, atu ajuda komuidade sira bele hetan informasaun kona-ba oinsa atu prosesa sira nia kazu tuir dalan no mekanismu formal ne'ebé eziste ona” dehan Diretór Ezekutivu JSMP, Luis de Oliveira Sampaio.

JSMP hanoin katak preokupasaun komuidade sira nian ne'e pertanente tebes, liu-liu preokupasaun kona-ba kazu violénsia doméstika ne'ebé aumenta aas. Tanba ne'e governu iha obrigasaun atu kontinua introdus no habelar informasaun kona-ba Lei Kontra Violénsia Doméstika ba komuidade sira.

Xefe Suku Holsa António Santa Cruz, iha abertura hato'o katak JSMP hanesan oganizasaun sosiedade sivíl ida ne'ebé ho nia papel importante no estratejiku tebes. JSMP hanesan mós parseira governu nian, tanba ne'e nia hanoin katak JSMP presiza ajuda governu hodi lori informasaun sira ne'ebé iha relasaun ho komuidade sira nia direitu no obrigasaun. Ida ne'e atu asegura katak komuidade sira bele hetan informasaun kona-ba oinsa atu lori sira nia kazu tuir sistema formal ne'ebé iha.

Sr. Santa Cruz apela ba partisipante sira atu aproveita oportunidade ida ne'e didiak tanba informasaun sira ne'e sei sai hanesan bukae ida ba partisipantes sira iha futuru. Tanba ne'e nia

Rua setubal, Colmera, Dili Timor Leste

PoBox: 275

Telefone: 3323883 |77295795

[www.jsmp.tl](http://www.jsmp.tl)

[info@jsmp.minihub.org](mailto:info@jsmp.minihub.org)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

enkonraza partisipante sira atu proativu hodi hatoo perguntas no preokupasaun ruma liu-liu iha relasaun ho realidade no situasaun loron-loron ne'ebé ita boot sira hasoru.

JSMP obeserva partisipante sira ativu no hatudu sira nia interese hodi hatoo sira nia perguntas no preokupasaun relasiona ho kazu violénsia doméstika ne'ebé kontinua aas, violénsia seksuál, kazu amante ne'ebé ikus mai hamosu violénsia no divorsiu. Aleinde ne'e partisipantes sira preukupadu liu kona-ba kazu inestu ne'ebé tuir sira katak hahalok ne'ebé la-bele tolera no tenke fo kastigu ho pena ne'ebe todan ba arguidu hodi nune'e bele iha *efek jera* (efeitu prevensaun) iha futuru.

Partisipantes sira mós husu atu governu no parlamentu la-produse deit lei, maibe oinsa governu tenke halo sosializasaun ba lei sira liu-liu Lei Kontra Violénsia Doméstika iha área remotas. Partisipante sira preukupu tanba maske lei ne'e aprova no tama ona iha vigor iha tinan 2010 maibe iha realidade komunidadade barak mak ladauk hatene no hetan informasaun loloos kona-ba lei ne'e.

Ba kestaun hirak ne'e JSMP esprika kona-ba prosesu justisa ba kazu violénsia doméstika no kazu violasaun seksuál tuir provizaun Kodigu Penal. JSMP mós esprika ba sira katak preokupasaun no rekomendasaun hirak ne'e sei hatoo ba governu ka instituisaun relevante liuhusi audensia sira ka hakerek karta, hodi bele hetan konsiderasaun ruma.

Treinamentu ida ne'e realiza tanba hetan suporta husi Embaixada Canada iha Indonézia.

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)